



Cambionan politico na Aruba:

Kico pa spera di Futuro y LPR

MIENTRAS eleccion 2024 ta yegando, dos partido politico relativamente nobo, Futuro y LPR, ta atrae atencion, particularmente pa motibo di e salida di nan lidernan for di AVP. Hopi ta specula cu e partidonan aki por kita voto for di AVP, pero un bista mas cercano ta sugeri cu e situacion por ta mas compleho.

E influencia creciente di Futuro

Lidera pa Gerlien Croes, Futuro tabatin un impacto inicial mirando e 1.919 voto cu Gerlien a genera den AVP den eleccion anterior, loke a posicion'e y su partido como un partido pa tene cuenta cu ne. E reciente incorporacion di ex-minister di RAIZ, Geoffrey Wever, na su liderazgo ta fortalece su atractivo, dunando e partido un figura politico mas estableci cu un experiencia gubernamental solido. Futuro tambe ta beneficia di movecionnan strategico, incluyendo activistanan di MEP, cu potencialmente por kita voto for di MEP. E combinacion di energia fresco y liderzgo cu experiencia ta duna Futuro un "hype factor", dunando e partido un potencial pa hala pa un cantidad significativa di asiento.

Sinembargo, tin un potencial desbentaha. Wever su vinculo

cu MEP por haci cu algun votado ta duda si Futuro lo keda realmente independiente, specialmente si nan sospecha cu e por alinea cu MEP den futuro. A pesar di esaki, ta spera cu e partido lo atrae voto di esnan cu ta busca un alternativa na politica tradicional, convirtiendo Futuro den un forza pa tene cuenta cu ne den e ciclo electoral aki.

LPR: Un strategia enfoca riba liderazgo

LPR, dirigi pa Rycond Santos do Nascimento, ta enfrenta un reto mas dificil. Den e ultimo eleccion, Santos do Nascimento a obtene solamente 214 voto y e partido mes no tin e profundidad politico necesario pa expande su influencia. E poder di e partido ta basa grandemente riba su lider y aunke el a expresa abiertamente su desden pa AVP, su preferencia cla pa colabora cu MEP por alinea votadonan indeciso of cu ta busca tereno mas neutral.

Sin un ekipo fuerte pa sostene, e chensnan di Santos do Nascimento pa aumenta e base di votado di LPR significativamente ta scars. Ta posibel cu su mensahenan directo ya a marca un rumbo pa su votadonan, limitando e potencial di e partido pa crece mas leu di su base actual di apoyo.

Un adicon nobo prometedo

Un punto positivo pa Futuro t'e candidatura di Gregory "Cholin" Ras, un figura prominente den e campo tecnico. Aunke nobo den politica, Ras ta aporta un experiencia considerabel y ta wordo mira como un adicon valioso n'e aliniacion di Futuro. Su presencia riba e lista electoral por yuda influencia votadonan cu mentalidad tecnico of esnan cu ta balora experiencia practico riba retorica politico.

Na caminda pa eleccion

Mientras cu eleccion ta yegando, Futuro ta parece di ta bon posiciona pa tin un impacto substancial, posiblemente hasta sorprendiendo su competidonan cu algun asiento. Mientras tanto, LPR por tin dificultad door di su strategia cu ta concentra riba e lider y su aliniacion cla cu MEP. Den e panorama politico dinamico di Aruba, ambos partido tin reto y oportunidadnan unico, pero e proximo lunanan lo revela con hopi influencia nan por tin den e urnanan.

